

29898  
-13

掌銓題稿

卷三十一之三十三  
廌叙賢齋



掌銓題稿目錄

卷之三十一

題大學士夏言復官疏

題侍郎曾鈞贈官疏

卷之三十二

題大學士梁儲孫補廕疏

再題大學士梁儲孫補廕疏

題大學士劉忠孫補廕疏

題大學士蔣冕孫補廕疏

卷之三十三

題侍郎曾銑廕子疏

題侍郎劉源清孫補廕疏

題侍書李中子改廕疏

題侍書鄭守德廕子疏

掌銓題藁卷之三十一

題大學士夏言復官疏

驗封清吏司案呈該原任少師兼太子太師吏部尙書華蓋殿大學士已故今復吏部尙書夏言孫夏朝輔奏稱臣係江西廣信府貴溪縣人充本縣儒學生員有祖夏言由正德十二年進士除授行人陞兵科給事中改翰林充經筵講官陞禮部尙書歷加前職竊惟臣祖猥蒙

先帝寵任忘身圖報遇事敢言冀展寸長仰  
天眷不意於嘉靖二十七年因總督陝西軍務  
兵部右侍郎曾銑欲復套地畫謀具奏  
命下臣祖同大學士嚴嵩會議柰緣忠姦不一  
面同背異臣祖以爲故土當復嵩則譖謂  
擅開邊釁危言爍金巧謗如簧致蒙

先帝深咎遂將臣祖與銑同坐斬罪家屬遠流  
萬苦難言恭遇

皇上登極

詔卹存沒大臣節該言官遵例舉奏國是始昭  
因此曾銑得經言官題

請并子曾忭陳乞特蒙

聖恩加贈兵部尙書臣祖隨經兵科給事中王  
治奏舉亦蒙

准復吏部尙書死者猶生流者得復

恩出望外伏念臣祖與銑同事同死銑今加贈  
尙書祖職未蒙全復若不比例懇奏臣祖  
生平心迹何由再白伏望

皇上下大施天地之恩乞

勅吏部備查臣祖生前履歷賢否如果忠勤無玷官守比照曾銑事例超復原職仍乞

俯賜祭葬諡廕庶使臣祖甘心瞑目雖死猶生等因奉

聖旨吏部知道欽此欽遵抄出到部送司案查隆慶元年十二月內該吏科都給事中王治等題該本部覆議得原任少師兼太子太師吏部尙書華蓋殿大學士夏言遭遇

先帝特達之知舉動乖違不能無罪但總督曾銑議復河套原係公事逆臣嚴嵩誣以交結近侍以致駢首并戮中外咸憤其寃卽今曾銑旣蒙昭雪夏言之枉委當亟爲申理合無將夏言量復原職等因節奉

聖旨夏言准復吏部尙書欽此又查得本年七月內該兩京科道官辛自脩等題稱原任兵部右侍郎兼都察院左副都御史曾銑乞

賜給祭葬贈廕等項節該本部議

請復職加贈兵部尙書廕一子照依贈官尙書

二品事例選用等因題奉

欽依訖今該前因通查案呈到部看得原任少師兼太子太師吏部尙書華蓋殿大學士已故今復吏部尙書夏言孫夏朝輔奏稱比例乞要復祖原職仍乞祭葬諡廕各一節除祭葬賜諡移咨禮部議覆併廕子一節擅難輕議外爲照本官特受

先帝知遇好大喜功生前固有可議但被人傾陷與曾銑駢首就戮死後不無可憫及查曾銑已蒙

優渥之典而本官原職亦當盡復以慰冤魂但恩典出自

朝廷臣等未敢擅擬伏乞

聖裁等因隆慶四年二月十九日題二十一日

奉

聖旨夏言准復原官

題侍郎曾鈞贈官疏

驗封清吏司案呈准禮部咨該巡撫江西等處地方兼理軍務都察院右副都御史劉光濟題據南昌府進賢縣申據本縣聽選官生曾允行呈稱有祖曾鈞由嘉靖十一年進士歷任南京刑部右侍郎六年考滿具疏乞休蒙

准致仕於隆慶四年二月二十一日在家病故例有應得贈諡祭葬伏乞申達轉賜題

請等因備申到臣卷查先准禮部咨爲申飭恩例以杜冒濫事該禮科都給事中王之垣等題本部議覆今後兩京大臣致仕在家病故於例應得

卹典者本處有司限三箇月以裏卽與具奏內止許直陳履歷聽候處分不得別加品題眩亂名實若係平生勲業隆重行誼超卓者撫按官不妨另奏等因覆奉

欽依備咨到臣已經遵行在卷今據前因該臣

看得已故南京刑部右侍郎曾鈞勲業行  
誼有足稱述今旣病故例有應得

卹典臣遵照近題事例特爲具奏伏乞

勅下該部再加查議照例

請給等因奉

聖旨該部知道欽此欽遵抄出到部送司行准  
吏部文選清吏司手本回稱本官歷官陞  
任與奏相同及准考功清吏司手本回稱  
查得本官三品已經考滿嘉靖三十七年  
十二月內因患病奏

准致仕等因回報到司查得

大明會典并見行事例凡兩京三品文官考滿  
病故者不分在任致仕俱祭一壇工部造  
墳安葬今該前因通查案呈到部看得原  
任南京刑部右侍郎曾鈞致仕病故該巡  
撫江西都御史劉光濟特與題

請應得

卹典一節除贈官移咨吏部施行外爲照本官

歷官三品已經考滿自因患病奏

准致仕所據祭葬似應給與合無照例與祭一  
壇并與造葬及照本官敷歷已久頗著賢  
勞正直素聞委無非議所據應否

賜諡伏乞

聖裁臣等不敢擅擬等因題奉

聖旨曾鈞准照例與祭葬還與他諡欽此欽遵  
備咨到部送司查得弘治四年五月內爲  
乞

恩贈諡事節奉

孝宗皇帝聖旨今後有乞恩贈諡的恁部裏還  
要斟酌可否來說務合公論不許一槩徇情  
比例濫請該科記着欽此及檢照諸司職掌  
內開文職官一品至五品照依生前散官  
果有功績合加封者例與加贈又查得刑  
部右侍郎該贈刑部尙書通查案呈到部  
看得禮部咨開原任南京刑部右侍郎曾  
鈞贈官一節爲照本官行已端嚴蒞官廉

正論其人品既優考其宦績亦懋所據贈  
官似應題

請但

恩典出自

朝廷臣等未敢擅便伏乞

聖裁等因隆慶四年九月初四日題初六日奉  
聖旨曾鈞贈刑部尚書

掌銓題藁卷之三十一

掌銓題藁卷之三十二

廕敘

照常處者不錄

題大學士梁儲孫補廕疏

驗封清吏司案呈據廣東布政司咨呈據  
廣州府順德縣申稱結勘得梁欽委係原  
任大學士梁儲親孫梁次挹嫡長親男身  
家並無違礙相應補廕等因到部送司案  
查先該廣東廣州府番禺縣儒學生員梁  
欽奏稱臣祖梁儲由成化十四年進士改  
翰林院庶吉士累官少師兼太子太師吏

部尙書華蓋殿大學士歷任四朝幾五十年殫勤夙夜頗效微勞正德十六年奉

皇太后懿旨往承天奉迎

世宗皇帝嗣登

大寶尋以老病懇辭蒙

准致仕仍賞玉帶金綺歲給食米人夫遣官護

送馳驛還鄉至嘉靖六年臣祖病故蒙

先帝追念往勞

卹典優渥舉家存歿感激緣臣祖大學士一品

九年考滿及侍

武宗皇帝東宮講讀俱未請廕臣父梁次挹原

係廩膳生員於嘉靖十五年二月內具本

陳乞蒙吏部題覆奉

欽依准廕中書舍人隨接到吏部劄付令其赴

京授職臣父偶患病在家調理延至嘉靖

四十五年八月內身故伏查吏部見行事

例凡大臣廕子未仕而故者許補廕一人

及查先年大學士劉健彭時孫劉得之彭

得順等各因伊父原任中書舍人未仕而  
故均得補廕臣係梁儲孫男梁次挹親子  
守制已滿相應補廕正與劉得之等事體  
相同况臣父所授中書舍人乃臣祖大學  
士一品九年考滿之廕載在舊例又非別  
廕可比如蒙

勅下吏部查照舊例准臣補廕等因奉

聖旨吏部知道欽此欽遵抄出到部送司已經  
行查去後今該前因案查嘉靖十五年二  
月內該原任少師兼太子太師吏部尚書  
華蓋殿大學士梁儲男梁次挹奏稱伊父  
講讀及一品九年考滿乞要將伊父錄廕  
本部覆奉

世宗皇帝聖旨是梁次挹准廕授中書舍人欽  
此又查得本部見行事例凡廕子未仕而  
故者許補廕一人又查得嘉靖二十一年  
閏五月內該已故少師兼太子太師吏部  
尚書華蓋殿大學士劉健孫劉得之奏稱

伊曾祖歷官一品雖蒙廕敘劉成學等爲中書舍人以痼疾身故乞要比例將伊錄廕等因該本部題奉

世宗皇帝聖旨劉健先朝賢輔伊孫劉得之准授尙寶司司丞欽此又查得嘉靖三十二年十月內該原任少保吏部尙書兼文淵閣大學士彭時孫彭得順奏稱伊父彭秉銳乞

恩蒙授中書舍人習字三年出身陡患風疾未仕身故乞要比例將伊補廕等因該本部覆奉

世宗皇帝聖旨彭得順准照例補廕中書舍人欽此欽遵通查案呈到部看得原任少師兼太子太師吏部尙書華蓋殿大學士梁儲嫡長親孫梁欽奏稱伊祖曾以考滿廕父梁次挹中書舍人偶因患病不痊未仕病故乞要比照劉健等事例補廕一節爲照大學士劉健孫劉得之係身後比例乞

恩得授尚寶司司丞原難例論惟補廕緣由既  
經原籍衙門結勘前來且與見行事例及  
彭得順所奏相同似應題

請補給但

恩典出自

朝廷臣等未敢擅便等因隆慶四年四月二  
十三日題二十五日奉

聖旨梁欽且罷已後年遠的不許奏擾

再題大學士梁儲孫補廕疏

驗封清吏司案呈奉本部送先該原任少  
師兼太子太師吏部尚書華蓋殿大學士  
梁儲孫男梁欽奏稱伊祖

東宮講讀及一品九年考滿廕父梁次挹中  
書舍人一向患病未任至嘉靖四十五年  
八月內身故今守制已滿乞要比例補廕  
等因奉

聖旨吏部知道欽此欽遵抄出到部送司已經  
移文原籍查勘去後續據廣東布政使司

谷呈據廣州府順德縣申結查得梁欽伊  
父梁次挹原蒙恩廕中書舍人時因患病  
未曾赴任出仕於嘉靖四十五年八月初  
十日身故欽係原任大學士梁儲親孫梁  
次挹嫡長親男身家並無違礙相應補廕  
等因到部送司查勘明白覆奉

聖旨梁欽且罷以後年遠的不許奏擾欽此臣  
等竊惟錄廕係

朝廷延世之賞豈宜輕得乃自

登極卹典一開當事者濫市私恩惟意所與以  
致人生妄念不論遠年近日事例當否悉  
來陳乞希圖倖得不惟冒濫名器亦且煩  
瀆

宸嚴深爲可惡自臣拱管理部事以來痛懲此  
弊不爲題覆者甚多今蒙

聖斷不許奏擾仰見

皇上慎惜名器至意臣等不勝欽服但梁欽廕  
事與一槩濫乞者不同查得見行事例凡

廕子未仕而故者止許補廕一人補廕之人又故不許再補此係

累朝以來相傳舊典一向遵行今梁欽實係大學士梁儲親孫儲因九年考滿例該錄廕伊男梁次挹爲中書舍人乃未仕而歿伊孫梁欽委應補廕昨者旣奉

欽依且罷豈敢復言但

祖宗明例未蒙議止今補廕如梁欽者尙有其人一向壅格欲行題覆則

皇上之明旨不敢違欲不題覆則

先朝之明例不敢廢只得明白題

請伏望

皇上仍將梁欽照例補廕中書舍人以後但有陳乞臣等必查其於例相合方與題行如係仍前濫乞者容臣等叅奏治罪庶

朝廷之恩賚加於其所不可不加而

國家之法度止於其所不可不止其於事理乃無遺說等因隆慶四年七月二十日題

二十二日奉

聖旨是梁欽准補廕中書舍人

題大學士劉忠孫補廕疏

驗封清吏司案呈該

周府長史司右長史今起復劉存恩奏臣祖

劉忠由進士除編修歷任少傅兼太子太

傅吏部尙書武英殿大學士致仕病故荷

蒙

聖恩遣官

諭祭造葬加贈太保

賜諡文肅先於正德五年七月初七日以掌詹

事府事吏部尙書歷俸三年考滿該吏部

照例請給

誥命查取應廕子孫彼時尙無應廕子孫以致

未蒙錄廕今臣生男餘蔭係臣祖嫡孫倫

序應該承廕臣伏念臣祖供職翰林纂修

兩朝實錄充

孝宗經筵講官者十載侍

武宗青宮講讀者五年主考鄉會試三次効勞四十餘年僅得考滿一次廕典尙未霑被臣又查得嘉靖三十二年中書舍人楊宗相奏稱伊曾祖楊一清於正德元年以左副都御史三年考滿彼時因無應廕之人未得錄廕比例要將伊弟楊宗植補前遺廕該吏部覆題奉

世宗皇帝聖旨楊宗植准送監讀書欽此欽遵訖臣再念臣祖於正德五年以二品三年考滿曾准吏部咨文及今子孫乞廕比與楊一清於正德元年以三品考滿身歿年久至伊曾孫楊宗植始蒙廕典者事體相同伏乞

勅下吏部查照楊宗植補廕事例將臣男餘蔭一體錄廕等因奉

聖旨吏部知道欽此欽遵抄出到部送司查得嘉靖三十二年三月內該中書舍人楊宗相奏稱伊祖少師大學士楊一清先任都

察院左副都御史三年考滿未曾錄廕乞  
要將弟楊宗植錄廕等因該本部題奉

世宗皇帝聖旨楊宗植准送監讀書欽此欽遵  
查得大學士劉忠於正德六年十一月內  
致仕伊男劉元嗣欽蒙

特恩廕中書舍人孫男劉存恩於嘉靖元年十  
一月奉

勅存問廕中書舍人陸續授官訖惟三年考滿  
之時向因無子未曾廕及行准考功司付  
開劉忠先年任掌詹事府事吏部尙書三  
年考滿與奏相同等因到部取具同鄉官  
兵部車駕司主事劉自存結狀聽選長史  
劉存恩男劉餘蔭委係原任大學士劉忠  
嫡曾孫別無違礙緣由前來通查案呈到  
部看得少傅大學士劉忠先任掌詹事府  
事吏部尙書已經三年考滿例得廕敘又  
查與楊一清三品補廕事體相同似應題

請但

恩典出自

朝廷臣等未敢擅擬伏乞

聖裁等因隆慶五年八月二十二日題二十四日奉

聖旨劉餘蔭准送監讀書

題大學士蔣冕孫補廕疏

驗封清吏司案呈該原任少傅兼太子太傅戶部尙書謹身殿大學士蔣冕孫蔣務稼等奏稱臣等祖冕廣西桂林府全州人

由成化二十三年進士改翰林院庶吉士授本院編修歷任前職先於正德九年以吏部侍郎三品三年考滿時因無子將兄尙書蔣昇之子履坦爲嗣承廕入監讀書正德十二年五月十六日因山西苛嵐等處并遼東開原等處各有斬獲邊賊功次又四川等處奏報大盜寧息蒙

武宗皇帝手勅廕一子中書舍人正德十六年臣祖一品三年考滿例該廕一子中書舍

人嘉靖元年三月內節該吏兵二部欽奉  
世宗皇帝手勅以入繼大統定策迎立加恩進  
封伯爵子孫世世承襲食祿一千石欽此  
臣祖具疏辭免復奉

世宗皇帝聖旨寫勅褒諭賜宴禮部仍廕一子  
錦衣衛指揮同知永遠世襲續該兵部題稱  
大學士楊廷和蔣冕毛紀等懇辭之疏至  
四至五雖蒙

准辭伯爵改廕指揮俱經日久未敢拜受乞量

加別項

恩典以爲大臣忠誠之勸又節奉

世宗皇帝聖旨楊廷和等除廕子指揮百戶外  
楊廷和再廕一子四品文職蔣冕毛紀廕五  
品文職各世世承襲欽此嘉靖三年臣祖懇  
疏休致荷蒙

先帝特准致仕

賜勅馳驛還鄉令有司給與月米人夫并奉  
旨前次有

旨論功

恩廕恩典等項着吏兵二部查議續該吏部等部會題節奉

世宗皇帝聖旨蔣冕勞勩異常旣辭免封爵照前旨廕一子做錦衣衛指揮同知世襲欽此嘉靖四年間兵部移文本布政司轉行本州查取臣祖應襲兒男起送赴部承襲維時臣父履仁年未出幼不能赴部具文本州轉申回報去後臣父不幸亦已蚤世臣務稼務樵孤苦伶仃委是日久不能赴京奏補前廕茲恭遇

皇上登極覃恩臣祖首蒙贈官

賜諡遣官祭葬如例臣等舉家存歿感戴

天恩未報萬一但念臣祖歷事

四聖頗効微勞歷官幾四十年位至輔弼秩居一品只以侍郎考滿承廕一子選授詹事府主簿到任方及兩月隨因臣祖致仕給假送親旋亦病故臣祖先後

恩蔭並未承補查得大學士梁儲以平山西岢嵐及開原四川等功補蔭孫男梁孜中書舍人歷陞禮部主事大學士楊廷和近已補蔭一孫尙寶司司丞又補蔭一孫入監讀書大學士費宏補蔭孫男費華中書舍人臣祖實與三臣事體相同伏乞

勅下吏部查照前項錄蔭果未承補照例題請銓授等因奉

聖旨吏部知道欽此欽遵抄出到部送司查得

正德十二年六月內該大學士蔣冕奏爲

辭免

恩命事欽奉

手勅前山西岢嵐等處并遼東開原等處各有斬獲邊賊功次近日四川等處又奏報大盜寧息內閣大臣贊謀定議致有成功梁儲蔣冕毛紀各賞銀五十兩紵絲四表裏梁儲蔣冕還蔭他子姪一人與倣錦衣衛世襲正千戶欽此臣具奏辭未蒙

聖慈俞允仍

勅吏部查內閣改廕文職事例具奏定奪該本部查議上

請節奉

欽依蔣冕廕一子中書舍人着不必再辭又查得嘉靖二十七年十月內該已故大學士梁儲嫡孫梁孜奏稱伊祖先蒙

特恩廕叔梁次揆中書舍人未仕病故乞要比例補廕等因該本部覆奉

世宗皇帝聖旨梁孜准照例補廕中書舍人欽此欽遵今該前因通查案呈到部看得已故大學士蔣冕嫡孫蔣務稼奏稱乞要比例補廕一節爲照大學士蔣冕輔政

先朝著有勩績荷蒙

恩廕

成命具存今其嫡孫蔣務稼委宜承補况查與大學士梁儲孫梁孜事例相合似應題

請但

恩典出自

朝廷臣等未敢定擬伏乞

聖裁等因隆慶六年閏二月初九日題十一日  
奉

聖旨蔣務稼准補廕中書舍人

掌銓題藁卷之三十二

掌銓題藁卷之三十三

廕敘

照常處者不錄

題侍郎曾銑廕子疏

驗封清吏司案呈奉本部送據直隸揚州

府申據江都縣起送已故原任兵部右侍

郎兼左副都御史今贈兵部尙書曾銑次

男生員曾汴身家無礙應該承廕到部送

司案查先該兩京科道官會舉乞要將原

任兵部右侍郎兼左副都御史曾銑等遵

奉

遺詔卹錄等因已該本部查議得本官以原職  
總督陝西三邊軍務嘉靖二十七年正月  
爲復河套事棄市應該復職贈官廕一子  
入監讀書照依贈官尙書二品事例選用  
題奉

欽依已經通行查取去後今該前因案呈到部  
看得前項錄廕旣經奉有

欽依相應題

請合候

命下將曾汭咨送禮部轉送國子監讀書臣等  
未敢擅便伏乞

聖裁等因隆慶五年十月二十三日題二十五  
日奉

聖旨曾汭准送監讀書

題侍郎劉源清孫補廕疏

驗封清吏司案呈據山東布政使司咨呈  
據兗州府東平州申稱查勘得劉國楨委  
係已故原任兵部左侍郎劉源清嫡長親

孫身家並無違礙相應補廕等因到部送  
司案查先奉本部送吏科抄出山東兗州  
府東平州儒學生員劉國楨奏稱臣祖劉  
源清原任兵部左侍郎遇蒙

恩詔廕伯劉爾耕入監讀書未仕病故乞要比  
照原任兵部尙書趙廷瑞補廕事例補廕  
等因具奏奉

聖旨吏部知道欽此欽遵抄出到部送司已經  
通行查勘去後今該前因查得嘉靖十二  
年十月該兵部左侍郎劉源清歷任未及  
三年考滿遇蒙

恩詔廕一子入監讀書開送長男劉爾耕前來  
承廕該本部題奉

欽依送監訖又查得本部見行事例凡廕子未  
仕而故者許補廕一人又查得嘉靖四十  
五年五月內該原任太子少保兵部尙書  
趙廷瑞男趙岳生奏稱伊父先以光祿寺  
卿遇蒙

恩詔廕弟趙廷璋送監讀書歷滿病故乞要比  
例補廕等因該本部覆奉

世宗皇帝聖旨趙岳生准補廕欽此欽遵通查  
案呈到部看得劉國楨奏稱伊祖劉源清  
遇蒙

恩例廕男劉爾耕未仕病故乞要補廕一節既  
經彼處查勘明白又查與尙書趙廷瑞事  
體相同似應題

請合候

命下將劉國楨咨送禮部轉送國子監讀書但

恩典出自

朝廷臣等因未敢擅便伏乞

聖裁等因隆慶五年二月初三日題初五日奉  
聖旨劉國楨准補廕

題侍書李中子改廕疏

驗封清吏司案呈該

制勅房辦事大理寺左寺左評事兼翰林院侍  
書已故李中男監生李佃奏稱臣父李中

係錦衣衛籍直隸河間府獻縣人由儒士  
除授鴻臚寺序班歷陞前職先於嘉靖三  
十七年七月內爲講讀事選補侍書  
皇上潛邸歷侍九年至嘉靖四十五年六月內  
在任病故恭遇

皇上龍飛九五恩澤遐施凡在

潛邸供事大小臣工皆得渥沾雨露臣具本陳  
乞於隆慶三年四月初六日該吏部覆奉  
欽依將臣與同事吳昴男吳子恕俱准令送監  
讀書舉家欣感無任竊念臣父效勞九載  
比之吳昴歷任數月者不同查得

累朝事例凡三年者錄廕習字出身未及三年  
者入監讀書伏望

皇上憫念臣父供事九載微勞

勅下吏部比照正字侍書吳謙周文通劉榮等  
事例將臣改廕翰林院習字出身以彰

國典等因奉

聖旨吏部知道欽此欽遵抄出到部送司查得

成化十五年閏十月內該已故太僕寺卿  
吳謙男吳榮奏要將榮送翰林院習字出  
身等因題奉

憲宗皇帝聖旨准他該部知道欽此又查得正  
德九年三月內該已故光祿寺卿周文通  
妻淑人延氏奏要將伊男周一元送翰林  
院習字出身等因題奉

武宗皇帝聖旨周一元准照吳榮例送翰林院  
習字出身欽此又查得嘉靖二十三年四月  
內該已故太常寺卿劉蔡男劉瑀奏要將  
伊孫男劉瑞送翰林院習字出身等因題  
奉

世宗皇帝聖旨劉瑞錄廕係劉蔡三年考滿今  
春宮正字年勞還照吳榮周一元例與他欽  
此俱經欽遵外今該前因通查案呈到部  
爲照侍書李忠供事九年委與吳謙周文  
通劉蔡相同吳謙等旣於身後廕一子送  
翰林院習字出身則李中之效勞年久當

與三臣一體蒙廕本部先題止擬送監讀  
書揆之情例實爲未盡今據李佃再奏前  
因該司查有舊例可援相應題

請照例改送翰林院習字出身但

恩典出自

朝廷臣等未敢擅便等因隆慶四年四月二  
十三日題二十五日奉

聖旨李佃准照例改廕習字出身

題侍書鄭守德廕子疏

驗封清吏司案呈奉本部送據福建布政  
使司咨呈據漳州府漳浦縣申稱結勘得  
生員鄭廷昇委係已故原任禮部祠祭司  
主事兼翰林院待詔鄭守德嫡長親男身  
家無礙相應錄廕等因到部送司案查先  
該原任禮部祠祭清吏司主事兼翰林院  
待詔已故鄭守德長男生員鄭廷昇奏稱  
臣父鄭守德係福建興化府莆田縣籍漳  
州府漳浦縣人由舉人授縣學教諭陞國

子監助教嘉靖三十一年八月內爲  
講讀事選補翰林院待詔供事

藩邸日侍

誦讀歷陞禮部主事效勞八年丁祖父憂回  
籍守制服闋赴部復除戶部四川司主事  
至嘉靖四十三年在任病故茲恭遇

皇上登臨大寶

覃恩宇內

藩邸供事大小舊臣沾被尤渥獨臣未蒙敘錄

臣查得原任

制勅房辦事翰林院侍書李中與臣父同時供  
事九年身故伊男李佃於隆慶四年四月  
內具奏陳乞隨該吏部查例題奉

欽依准廕李佃翰林院習字出身臣父效勞年  
載正與李中相同伏望

皇上憫念舊勞查照李佃事例將臣父應廕兒  
男錄廕翰林院習字出身等因奉

聖旨吏部知道欽此欽遵抄出到部送司已經

查勘去後今該前因查得隆慶四年四月  
內該已故

制勅房辦事大理寺左寺左評事兼翰林院侍  
書李中男李佃奏稱伊父侍書效勞乞要  
比例送翰林院習字出身等因該本部覆  
奉

聖旨李佃准照例改廕習字出身欽此欽遵通  
查案呈到部看得原任待詔鄭守德侍從  
藩邸勤勞九年委與李中事體相同又經彼處

結勘明白似應題

請合候

命下將鄭廷昇照例送翰林院習字出身但

恩典出自

朝廷臣等未敢擅便等因隆慶五年三月二  
十七日題二十九日奉

聖旨鄭廷昇准照例習字出身

掌銓題藁卷之三十三

國

金長

